

Monsieur

J'ay senti les effets de vostre bienveillance en tant
 d'occasions, que ie ne scaurois sans ingratitude iuger que
 les choses qui me touchent ne vous soient en aucune consi-
 deration, mais ie ne laisse pas de remarquer les degres
 de plusieurs affaires qui doiuent aller bien loin devant les
 miennes, et de penser qu'en cete rencontre que la naissance
 d'un second appui de cet estat vous aura obligé a faire
 diuerses depesches vers les plus grands de l'Europe, c'est
 beaucoup que vous ayez daigné ouvrir mes lettres, et bien
 plus que vous ayez pris la peine de faire ce dont ie vous suppliois,
 et m'en auertir. J'ay enuoyé le compromis a Woelfenauer
 affin qu'il en escriue et signe deux exemplaires et les enuoye
 tout droit a Leyde pour vous estre rendus d'autant plutost.
 J'espere que ce fera avec ce paquet. Il y adiouftera aussi que
 pour rendre le nombre des voix inegal il est d'accord que celles
 de M^r les Professeurs de Leyde ne soient contées que pour une;
 et il s'oblige a dupliquer dans 15 iours apres auoir receu
 l'escri de St. luy donnaist il des le iour mesme que le
 compromis fera signé. Pour le tems de la conuocation des
 arbitres il le laisse entierement au choix de l'autre, car soit
 qu'ils s'assembent ou ne s'assembent pas, puis qu'ils mettront
 leurs opinions par escrit, il n'importe, et ie scay que quelques-
 uns d'eux ayment mieux qu'on ne s'assemble point, et ne
 veulent donner leur opinion que par escrit. Si St. signe
 ce compromis ie croy qu'il aura droit d'adioufter au bas
vi coactus et que vous n'auez pas moins de pouuoir sur luy



que

que les Empereurs d'Orient sur leurs sujets, mais il ma
desja trompé en tant d'autres choses que s'il me trompe
encore en celle cy ie ne le trouueray pas estrange et i'en
seray tres aise.

Au reste Monsieur, i'ay vü les escrits que vous m'auer
fait l'honneur de me communiquer, et ie vous diray icy sans
complaisance que ie n'en aduire pas tant la force des
raison, non obstant qu'elles soient sans replique, ny la beauté
et neteté du style, laquelle vous est ordinaire, que ie fais
l'extreme moderation dont vous usez, demeurant toujours
dans les simples termes de la defense, et laissant toutes les
occasions d'attaquer qui n'ont pu manquer de se presenter
a vous d'elles mesmes. Il est vray que cete douceur, quoy
qu'elle soit extremement amable, n'est toutefois point avan-
tageuse a vostre aduersaire, car elle fait paroistre son
procedé d'autant plus rude, et le mot qui vous est eschapé
qu'il vaut un peu mieux louer des escrits d'un grand homme
qu'on n'a pas acheuez de lire que de se declarer resolu de
longue main d'affaillir ce qu'il n'a pas encore produit, ny
acheué, est un coup qui porte si droit, que quoy que vous
l'espargniez en tout le reste, il ne laisse pas d'en auoir
assez pour se deuoir faire a l'auenir, et penser qu'il eust
mieux fait en sa preface s'il n'y eust rien mis hors de son
sujet. Je ne puis que ie ne vous parle ouuertement, ie croy
qu'il est plus a plaindre qu'a haïr, J'ay un ami a Leyde
qui le voit quelquefois, et qui m'a dit il y a long temps

qu'il

qu'il se vouloit retirer peu a peu de sa frequentation, pour
 cela seul qu'il le trouue trop passionné en ses querelles, et
 que quelque bon visage qu'il face paroistre, il retient en luy
 une humeur chagrine qui le tourmente toujours en son
 interieur. cela se doit a me semble plustost appeler maladie
 que vice, et pour un homme qui a d'ailleurs de bonnes qualitez
 il est a desirer qu'il soit gueri, a quoy il me semble que
 vostre escrit peut beaucoup servir tant par le grand exemple
 de civilité et moderation que par les visites qu'il y peut
 trouver. J'en ay tiré une copie que ie ne feray voir a personne
 si vous me le defendez, mais ce seroit dommage de la cacher
 et ne craignez pas que cela l'oblige a vous mesler encore en ses
 imprimer, i'ay assez vû par ses discours qu'il est marri d'auoir
 comencé, mais son humeur ne luy permet pas de faire un copli-
 ment de bonne sorte. Je scay que c'est a vous que ie doy le liure qu'il
 m'a enuoyé, car ce n'a esté qu'apres auoir vû vostre escrit, et
 toutefois ie ne scaurois deviner a quelle fin il me la enuoyé,
 iuger en sil vous plaît sur la lettre qu'il m'escrivoit. s'il y
 eust mis des paroles un peu plus courtoises en parlant de vous, i'eusse
 esté bien ayse de vous la pouuoir deslors enuoyer, et i'auois tenu
 a grand honneur si i'eusse pu servir d'instrument a le bien mettre
 avec vous, mais de la façon qu'elle est dictée ie peulay n'auoir
 rien a vous mander ny a luy respondre. Je suis

Monsieur

De Gantport le 17 Dec. 1639

Vostre tresobeissant et
 tres passionné seruiteur
 Des Cartes

[Faint handwritten text, likely bleed-through from the reverse side of the page. The text is mostly illegible due to fading and ghosting.]